

Décision de Mgr l'Evêque sur la prière dite

"Maamu wa Bupole"

DYETU DIYI PA DISAMBILA DYA MAAMU WA BUPOLE

Beena Nkristo nanyi bananga,

Mvula yakumbanyi mulongo indi mwebeja, mulondolola, mujooja disambila ditudi tubikila ne : "Maamu wa Bupole". Kasaka ka Cipangu Cikulu cya Basadidi-Bakulu (Conseil Presbytéral) kavwa kabidi katentemuka, kaya kuyukila ne Mulombodi wa disambila edi, wetu Père Jean-Marie Kalala. Dya leelu, ndi muswe kufila bulongolodi budi mwa kuteka disambila edi mu lungenyi lwa Ekeleziya, bwa kufikisha bonso ku bunsanto.

Dya mbedi, Mwaku wa Mvidi Mukulu udi utwambila ne : « Kanujimi Spiritu, kanupeepeji dipa dya bwambi, apo londololayi byonso : cidi cimpa nupilame, ne nudilame ku bubi » (1Tes. 5, 19-22).

Patudi tutangila disambila edi, kudi malu malenga kabukabu adidyo ditwadila beena diitaba, bu mudi : dinanga dya lonzadi, aba bakudimuna moyo, bamwe banangulula didifila dyabo...

Ku lunga luseka, kudi maalu adi enzeka momu kadi mikale elesha meeji, mafwana kulela ntupakanyi mu maalu a diitaba. Bu mudi badi badyamba se : « Badi buwujibwa kudi banjelo ne bansanto ». Padibo babiikila Spiritu Munsanto bwa apweka, banjelo ne bansanto abo (Elie, Gedeon, Michael) ke badi balwa pamutu penda, babanga kondopa. Ne bavwa mu Mukanda wa Mvidi Mukulu kabayi bondopa, bakadi amu bondopa !

Pamwe apa, nsombelu mwine wa beena mapa abo, kayi amu wa citeumbu to, ... a.n.

Ke bwalu kayi ndi mpatula bulongolodi bupyabupya, ne kiipacila ka kutungunuja bidi byakane, kumbusha bidi bifwana kulela ntupakanyi.

I. BULONGOLODI BUPYABUPYA PA DISAMBILA EDI

1. Disambila dyenzekela amu ku Cikongo (Paroisse), ku bulombodi ne bulongolodi bwa Ndeji wa Cikongo (Curé). Mukwabo mwaba to! to, to!
2. Mukuna kawikadi ne: amu ku Beena Bilonda to! Cikongo cyonso cidi ne bwa kwikala ne waci mukuna . Nanku dituku dya 27te badi ne bwa kuditentemuna bwa se : disambila dya ku mukuna kadinyangi dya dyalumingu anyi binga bibilu to. Kutwadija ku leelu, nedikale dyenzeka mu cipolu cya matuku asatu aa : mu disaatu, mu dinayi ne mu ditaanu dya lumingu lwinayi lwa ngondo.
3. Ndeji wa Cikongo aditacisha bwa kwikala pabwipi ne beena disambila, bwa kubatungunuja byakane mu njila wa lupandu. Amu yeye ke udi ne bwa kutenteka byanza, kubenesha bantu ne bintu, kulongesha Mwaku (anyi kupesha dilongesha kudi muntu mulongolola kudiye).

Diiba dya kubila Spiritu Munsanto, ki ndya Banjelo ne bansanto balwa to. Udibo babikila nSpiritu Munsantu ; Banjelo ne Bansanto abo badi balwa kukeba cinyi diiba adyo? Nanku, piikala cikondo eci cya dibila Spiritu Munsanto cikumbana, muntu yeye mutwadija kupuma bu nguluba, kututa bakwabo mitu, kudya mashinda, kutwadija kulenga bantu ne : “ ndi ngondopa”, udyamba ne: “ngaalu ntempelo muwuja kudi mwanjelo ne munsanto”, wakula bu ba bilumbu (=ba Mwa Mulopo), ewu muntu ngwa kupatula mu disambila dyakamwe. Banjelo ne bansanto, tudi naabo mu bobumwe, kadi bobo ki mbatwangaji pankaci pa Mvidi Mukulu Spiritu Munsanto ne bantu to. Bwalu ebu ntumpakanyi minene idi mwa kulalula Bantu.

- 4. Cibiikidilu cya ne “mbeena mapa” ncy a kumvwa pa cyocyo. “Kakwena mwena Kristo udi mutambula batismo ne konfirmasiyo kayi ne dyenda dipa dya kwibaka nadyo Ekeleziya to. Aba ne mbena mapa, bakwabo ne kabeena nawu, ndipeepeja dya Spiritu Munsanto mwine!**
- 5. Beena disambila dya “Maamu wa bupole”, badifila paabo mu byota, ne nangananga batancila bimanyinu bya lupandu (= Nsakramento) bidi Kristo mushiya bu njila misunguluka idiye utungunuja nayo mudimu wende wa kupandisha baana ba bantu. Kudyombola nsankramento, nkwela Ekeleziya nyima.**

II. KIIPACILA KA DIYI EDI, NKUYA LUMWE

Banyi bonso baswibwe,

Kiipacila kanyi nka se: tuya lumwe, nanku butuku bucya lukasa. Disambila dya “Maamu wa bupole” ndipa dya Mvidi Mukulu, patwikala badilonga mu bulongolodi bwa Ekeleziya. Ke bwalu kayi ndi nteeka Kasaka kadi kadilombola mu Ntenji.

Mukunguji wa koko aka udi amu yeye Père Jean-Marie Kalala mwine, pamwa ne bakwabo basadidi biikale pamwa nende, bandi nteeka. Mu Ntenji mujima wa Mbujimayi, njila wa kulonda wa disambila ikala wa momumwe. Ne muntu yonso ne mwaba onso, bamulonda, bamunemeka.

III. NJILA WA KULONDA MU DISAMBILA KE YEYE EWU:

- 1. Musambu wa dibwela**
- 2. Difunda nkuruse**
- 3. Luzandi anyi njila wa nkuruse**
- 4. Ditonda dikalapu dya Yezu Kristo**
- 5. Musambo wa Yezu Butoka bwa bukwa panu**
- 6. Ditwa binu ne ditonda mpekato ne myaku ne misambo**
- 7. Disompolola**
- 8. Dikoma ditonda dya mibi**
- 9. Mwaku wa Mvidi Mukulu**
- 10. Dibila dya Spiritu Munsanto mu ditumbisha (Apa kakwena dipweka dya bansanto ne banjelo to)**
- 11. Malomba**

12. **Milambo**
13. **Mamanyisha ne majadiki**
14. **Ditenteka byanza dya Basadidi-Bakulu ne dibenesha dya bintu**
15. **Disambila ne dibenesha bya ndekelu**

IV. NKOMENU

Mushala mutekemena ne : butoke ebu budi bwambulwisha munangi yonso wa disambila dya "Maamu wa Bupole", wabenga kulonda mmudilamuna nkayenda mu Cisumbu eci cya beena Katolika. (Kt Mat. 18,17).

Ne dibenesha dyanyi mu dina dya +Taatu +dya Mwana +ne dya Spiritu Munsanto, Amen !

Byenza mu Mbujimayi, dya 19.02.2013

Bitwa cyala dya 03.05.2018

+ Taatu Emmanuel-Bernard KASANDA

Mukubi-wa-Ntenji wa Mbujimayi